



BIVŠI TRENER DINAMA,
OSUĐEN NA ZATVORSKU
KAZNU, UHAPŠEN PA PUŠTEN

Mamić se svake sedmice mora javljati policiji



Zoran Mamić ispred Suda BiH
FOTO FENA

Bivši trener Dinama, osuđen na zatvorsku kaznu, uhapšen pa pušten

Mamić se svake sedmice mora javljati policiji

U Sudu BiH održano ročište te su mu određene mjere zabrane, a oduzeti su mu i dokumenti

Dragan SLADOJEVIĆ
dragans@nezavisne.com

SARAJEVO, MEDUGORJE - Zoran Mamić, nekadašnji trener Dinama, pravosnažno osuđen na četiri godine i osam mjeseci zatvora zbog izvlačenja novca iz tog kluba, juče ujutru je uhapšen u Medugorju, po

potjernici koju je za njim raspisao Interpol radi služenja kazne u Hrvatskoj, a već popodne je pušten, s tim što se jednom sedmično mora javljati policiji, dok izručenje nije ni razmatrano.

Naime, u popodnevnom satima u Sudu BiH održano mu je ročište te su mu određene mjere zabrane, a oduzeti su mu i dokumenti i mora se javljati policiji, tako da se, ponovo, našao na slobodi, a nije ni raspravljano o njegovom izručenju jer, kako postoje tvrdnje, Hrvatska još nije poslala zvanični zahtjev.

Mamića su ujutru uhapsili pripadnici **SIPA**, a na temelju Međunarodne potjernice, koju je

za njim raspisala Interpolova filijala u Zagrebu.

"Na osnovu operativnih saznanja pripadnici **SIPA** locirali su ga na području Medugorja, nakon čega je uhapšen i priveden u prostorije **SIPA** radi kriminalističke obrade, a potom predat Sudu BiH na dalje postupanje", naveli su iz **SIPA**.

Izvori "Nezavisnih" potvrdili su da je **SIPA** već juče ujutru pokušala predati Mamića Sudu BiH,

HRVATSKA JOŠ NIJE POSLALA ZVANIČAN ZAHTJEV ZA IZRUČENJE

ali taj proces nije okončan odmah, jer nije bio testiran na koronu. "Desetak minuta proveo je u Sudu BiH, a potom je vraćen kako bi se testirao. Tek nakon testiranja predat je Sudu BiH", ističu naši izvori.

U Sudu BiH potom je održano ročište, a po svemu sudeći, budući da je i bh. državljanin, on neće do daljeg moći biti izručen Hrvatskoj.

I sam Mamić ranije je potvrdio da ima državljanstvo BiH te zatražio da zatvorsku kaznu koja mu je određena u Hrvatskoj izdržava u BiH.

Jučerašnje hapšenje Mamića komentarisao je i hrvatski ministar pravosuđa Ivan Malenica, koji je rekao da se radi o ubičajnoj proceduri.

"Ono što je nadležnost Ministarstva pravosuđa i uprave, pripremamo dokumentaciju za zahtjev za izručenje i sukladno tome će nadležni sud u BiH reagirati. Na nadležnom sudu u BiH je da utvrdi sve činjenice te ima li elementa da se Zoran Mamić izruči Hrvatskoj", rekao je Malenica.

Vrhovni sud Hrvatske je, podsjetimo, Zoranu Mamiću kaznu smanjio sa četiri godine i 11 mjeseci na četiri godine i osam mjeseci. Njegovom bratu Zdravku Mamiću, bivšem prvom čovjeku Dinama, taj sud je pravosnažno potvrdio kaznu od šest i po godina.

Iako je Hrvatska slala zahtjeve za izručenje Zdravka Mamića toj zemlji, Sud BiH je donio odluku da ga ne izruči jer ima i bh. državljanstvo.

Međutim, kako je juče objavljeno, hrvatsko pravosuđe odbilo je zahtjev Zdravka Mamića da zatvorsku kaznu služi u BiH, čiji je državljanin. Prethodno je odbijen i Zoranov zahtjev da zatvorsku kaznu služi u BiH.

Obojica braće utočiste su pronašla u Medugorju, a i Zdravko je juče viđen u Sarajevu, ispred Suda BiH, gdje je, kako je potvrdio, čekao brata da se zajedno vrate u Medugorje.

"Čekamo da se sve ovo završi i da Hrvatska ustupi predmet. Navikli smo i gubiti i pobjeđivati. Ne mogu reći da je situacija zgodna za pjesmu, ali kada ste me vidjeli, čuli ste da pjevam", rekao je Zdravko Mamić za sarajevske medije.